

STRAFUTTENZA

I picciotti ficiru na mangiata
e na rarigghia vosiru prestata
io ci dissi "tiniti l'occhi aperti
chi nun vulissi chi fussi straviata
e quannu vi saziati a cu v'a detti
purtaticcilla tutta puliziata".
Ma nun si sapi com'è chi successi
chi pi sfurtuna all'ultimu si persi
e fu accusi chi sta bedda rarigghia
io nun la vitti turnari nfamigghia.
Nautra nova mi n'app'accattari
e ora pi mia si ponnu arrangiari
chi mi custau decimilaliri
e nun la prestu cchiù pi l'avveniri,
a cu la voli pi daricci nnizzu
d'accattalla ci dugnu l'indirizzu.
Li capagnoli putissiru dari
quattru ova misi dintra na sacchina
o puru ficu fatti o anticchia favi
o pumaroru o rappi di racina
ma lu paisanu spissu nun ci abbara
di purtari vacanti li panara
ed è pi chissu chi 'na pocu genti
di la campagna nun liccanu nenti.
Mparativillu chi può capitari
di putiricci puru varagnari
e qualchi vota putiti piscari
siddu rispettu sapiti purtari,

ma nun ci voli cumminari 'mbrogghi
e si la robba dintra s'arricogghi.
Ancora nun lu pozzu addulurari:
detti na cosa e ci l'app'appizzari
faccia sasizza duci nzucarata
e ora chi finiu sapiddu dunni
nun la viu cchiù mancu di passata
e all'ultima facennu li cunti
cu fu di bonu l'appi "regalata".

SPAVENTU

Li nostri terri lucenti di suli
tutt'a na botta addivintaru scuri
e dunni chi lu suli sempri regna
si ci attruvau na pocu di negghia.
Lu Munnu nterra pari chi cariu
chi lu lassau la manu di Diu,
munnu di mrogghi e munnu di mpapocchi
chi pi durari av'a rapiri l'occhi
picchè di ddocu oramai si viri
comu chi si putissi scumpariri
e tutti cosi farisi nfrantumi
siddu pi sbagliu s'ammacca un buttuni.
Latti e verduri nun si può mangiari
sti cosi a tutti ni fannu scantari
chi a momentu nun si può ciatiari
pi curpa d'u disastru nucleari.
Iu a finiri chi tuttu lu Criatu
nun può campari senza lu progressu
però ancora nun s'ha calculatu
sennucci iddu si mori lu stessu.
Ma pi sta vota pari chi finiu
però si passa tempu chi succeri
chi pi la genti diventa castiu
e chi ni dassi na pocu pinzeri?
L'unica cosa fussi arragjunari
cu sintimentu di patr'i famigghia
li guerri e la politica lassari,
la fuddunia di dunni pigghia pigghia

cchiossai di mali nun sapi chi fari
ma ora si pi veru s'arruspigghia
cu è chi vinci nun si può cuntari:
semu mpaiati tutti a na parigghia
e nun resta cchiù nuddu pi parlari
siddu si fa la morti trionfari.

A MIRICATA

C'è un picciottu lisciu e pettinatu
travagghiaturi e assistimatu,
cu serietà dintra na farmacia
quannu travagghia mai iddu babbia.
Na vota sula cu mia ci ha scherzatu
p'u fattu chi m'avia nsimpatia
mi retti unu di chiddi bucatu
un s'aspittannu com'è chi finia;
ssa vota fu chi arristai fregatu.
Ne' primi tempi ci lu rinfacciava
eramu quattru e quasi ch'abbastava
semu ora cinqu e a picciridda crisci
è junta ora a signu chi capisci,
na fimminedda ncase chi piaci
è comu l'angiuliddu di la paci.
Cu Peppi ora sacciu comu fari
nun cinni ricu cchiù mali paroli
restu obbligatu e l'aiu a ringraziari,
quantu è sturiusu e quantu è geniali,
pi tuttu chiddu chi mi vosi dari.
Fimmini, si quarcuna un può abbiccarci
ni Peppi itivi prestu a sarvari
avi un sistema chi nun può falliri
iddu li figghi vi li fa aviri
megghiu du profissuri Cittadini.

TEMPI CHI FORU

Quannu succeri chi semu tranquilli
e lu pinseri nostru si svaria
nta ddi momenti di rilassamentu
tutti pigghiati di la fantasia
ni ricordamu nichì e picciriddi
quantu beddu ssu tempu ni paria;
si ancora stinnigghiavamu la manu
tuccavamu la guerra chi sinn'ia
ed è un ricordu sempri chiù luntanu.
Li tempi d'ora tutti cunfusionsi
ncunfruntu di dda vita a la iurnata
nun c'è di fari nancu paragoni
mi parinu na cosa esagerata.
Niatrì certu nun eramu ricchi
c'era sempri nto stipu un pezzu i pani
tumazzu alivi viridi e ficu sicchi
e un pizzuddu di terra a siminari
mennuli pumaroru e vinucottu
certu nun si putiamu lamentari
sardi salati dintra lu curriottu
nta li cannizzi si putia truvari
favi ciciri orio e furmentu
lu vinu bonu nta lu carrateddu
pi usu di famigghia cunsumari.
Quannu vulia fari un cumprimentu
a chiddi di pitittu cchiù addumati
ci regalava carrubbi nfurnati,
s'i rusicavanu tempu un momentu

lu stommacu nto'ncorpu ci abbuffava
e lu pitittu anticchia ci passava.
Nta lu iardinu poi c'era un tesoru
limiuna pira pessichi e banani
pruna tagghieri e sparaci di tronu
lu furnu a ligna pi fari lu pani
li addineddi chi facianu l'ovu
la pinnata cu i ligna d'abbruciari.
Pi l'atri cosi n'aviamu arrangiari
nun c'era ne salami ne nutella
c'eranu sulu cosi naturali,
quannu io canuscivi a murtatella
cu i causi longhi sapia caminari
ed era megghiu pi evitari guai
chi nun l'avissi canusciutu mai.
Li scarpi li vistita e li cammisi
si facia comu chi si putia fari
capitava na vota ogni ottu misi
d'aviri un paccu di l'amiricani
quannu io appi lu primu piggiama
avia quasi la varva nutricata
mi lu pruvai pi na iurnata sana
mi paria na divisa di parata.
Me patri la bonarma fici fari
napocu zzocculi cu lu tistali
doppu p'accuntintari tutti i figghi
ci fici fari i scarpi cu l'armiggi.
Lu lettu meu era fattu di ferru
avia li trispa e tavuli di lignu
pi quariallu aviamu u cufuneddu,
e sistimannuci a ciancu lu circu,
cu ddu cuperti pi cummigghiatura,
una di chissi era militari
e nta la panza avia na foratura
di na mitraglia chi s'appi a puntiari.

Poi nta li siri di friddu cchiù azzenti
di lu sirenu quannu chi s'aggigghia
unn'attruvannu di pigghiari nenti
di supra mi mittianu pi cavigghia
un cappottu cu tuttu u scapularu
di pannu duppiu adattu pi viddanu.
Era na scena chi un si può cuntari
un cufuni pi cinqu avia a bastari
si pigghiava lu focu d'a ghiucchena
e li fimmini tutti friddulusi
ci accumulincianu cu sta rantena
si spiccicavanu doppu arrustuti.
Io tanti voti pi unn'aspittari
e dimostrari di farini a menu
chi sennu masculu putia agguantari
senza cufuni mi n'ia a curcari.
Penza chi lettu chi vaiu a truvari
li linzola mi parinu vagnati
lu trimulizzu mi metti a pigghiari
li denti chi mi battinu ncasciati
e ammatula mi staiu arrunchiatu
si prima nun sugnu tanticchia quariatu
nun la finisciu cchiù di trantulari.
Ora sti cosi si ponnu sunnari
avennu picciuli tuttu s'accatta
vi bisogna lu lettu di quariari?
c'è fatta apposta la termocoperta
metti la spina ti puoi ristorari
lu friddu nun ti passa pi la testa
nto lettu cauru ti puoi curcari.
Si i nostri nanni avissiru a turnari
com'eranu e so tempi abituati
certu chi nun putissiru campari
truvannusi talmenti spaisati
supra sta terra di li tempi d'ora

pi quanti cosi chi sunnu canciati.
Cu la modernità e li cosi boni
semu nfilati nta na cunfusionsi
e assisti a tanta malarucazioni
li ñostri nanni là vonnu scanzari
nun sannu unni si vannu a mpirtusari
quantu cchiossai si ponnu alluntanari.

LU SCIABBICUNI

Cchiossai d'un annu avia chi un gnia a mari
e capitai non postu di cuticchi
chi un si putia mancu caminari
senza fari li peri a ficusicchi.
Araciu araciu mi misi a natari
e nta lu funnu li peri appuiannu
ci fu la prima prazioni di dannu
na medusa mi vinni a muzzicari.
Sintennumi lu peri abbuffatu
mi misi supra un scogghiu a cuppuluni
c'era l'acqua funnuta a lu me latu
tinni lu ciatu e fici un capuzzuni
e mentri chi nnavanti sbillittai
stava quasi pirdennu lu custurni
chi mi calau sutta mmezz'i peri
e tutti cosi fora m'attruvai.
Sutt'acqua a mia mi vinni lu chiffari
d'arritirarimi lu sciabbicuni
chi mi stricava nterra mari mari
mi mpirugghiava puru di natari
li naticchi m'avìa accupunari
comu putia all'affaciu spuntari
cunsignarimi accussi a me muggghieri
cu quali facci m'avìa a prisintari!
Quannu chi finarmenti assummai
e vinni fora alla luci accummigghiatu
cinquanta passa di dunnì mi ittai
avia persu già tuttu lu ciatu

mancu pi lu spaventu chi pruvai
di nesciri di l'acqua spinnazzatu.
Dissi me figghiu chi ci stesi assai
nun sapennu di soccu arrisicai
arré di veniri fora alla luci
nuru comu dda vota chi aggigghiai
e li cristiani di ittari vuci
e c'ivi bonu ch'un mi spurmunai.
S'avissi stata fimmina macari
m'appresentava cu li cosi fora
nenti si ci putia criticari
picchè si sapi d'essicci sta mora.
Lu masculu la cosa è dilicata
sunnu tesori di stari sarvati
si sunnu sciotti c'è mala pinzata
c'è scantu puru d'aviri nirvati:
sunnu biddizzi pi li familiari
chi nun si ponnu mancu scuppunari
quannu succeri chi si cari a mari!.

NA CANNILEDDA

Caru Filippu t'aiu a ringraziari
d'i poesi chi mi vulisti dari,
ni liggivi napocu cu attenzioni
e ci attruvai tanti cosi boni.
Si parla di natura sulì e mari
e di paisi nte quadri pittati
cinni sunnu chi vannu ddittu o cori
ci nni su chini di significati
di vaneddi di chiesi e campanari
e di usanzi quasi trapassati
di quannu ancora eramu scolari
chi ti li senti dintra ncarnazzati
e nun si li putemu cchiù scurdari
chi foru dintra a niatri nutricati.
Nta picciuttanza ni fannu turnari
però ristannuci sempri attaccati
e secutannuli ad aviri mmenti
nun ci tirannu cchiù p'i cosi d'ora
ni tinemu agnuniati e indifferenti
e va finisci chi arristamu fora
di st'anticchia di vita d'u presenti.
E fin'a ddocu un c'è nenti di mali
sapennu chi su cosi naturali
si la vicchiaia s'avi arricampari
megghiu chi ni mittemu a prepararari.
Già lu capisti chi staiu babbianu
c'è tempu ancora unn'è cosa di st'annu
picchi ancora putissimu abballari

(senza però tantu ciatu spardari)
e la vicchiaia è megghiu ch'addimura;
mmezzu di li cristiani assistimanti
ci semu puru chiddi babbatura,
io appartegnu all'ultimi citati
e si parlamu di letteratura
ti dicu subbitu chi quannu ivi a scola
era di raggiunera e curdiatura
ni capisciu perciò qualchi parola
chi a masticalla mi vinia dura.
Ci sunnu artisti, granni luminari,
chi fannu luci a tutu l'Universu
nta li so poesi ci puoi attruvari
mmiscati fantasia scienza ed estru.
Cinn'hannu statu puru chi li parti
l'avianu nta lu sagnu di natura
li facianu prestu tutti giusti
e senza fari usu di scrittura;
ci ni fu unu si mparau a firmari
nta ddi momenti quannu si mitìa
ennu sutta u carrettu a ripusari:
la ficurinia pi quadernu avia
scrivennu c'un spuntuni di zabbàri.
Si chiddi fannu luci all'Universu
la me poesia è fatta a tempu persu
dici soccu mi passa pi la testa
e resta mperi pi filosofia
avi la luci di na canniledda
chi sta addumata pi stentu e magia,
na luci lenta bianca e nicaredda
chi nun lu sacciu mancu si quaria
ma senza scienza mi pari cchiu bedda
e sperassi chi piaci puru a tia.
Vaiu rimannu e ci l'aiu pi mmercu
ma frasi mpirugghiati nun ni cercu,

sugnu d'a scola di Petru Fudduni
e si succeri parlu a rufuliuni;
doppu chi fici sta rivelazioni
nun mi nni pozzu fari cchiù illusioni
ci mettu u puntu e ddittu mi nni vaiu
salutu di dda coppula chi aiu.

CU L'OCCHI APERTI

La biddizza si leggi
nta l'occhi di cu talia.
A notti china
mi sbia lu sonnu
e penzu a tia.
Staiu cu l'occhi aperti
ti cercu nta lu scuru
e t'aiu nta lu pinzeri
pi cumpagnia.
Lu tempu passa,
restu vighhianti
e nun pinzannu si aggiorna
passanu l'uri.
Doppu ti viu
chi ti metti li manu
supra la testa,
ti stinnigghi nta lu lettu
e dormi u stessu
di un picciuneddu cauru cauru,
cu a testa sutta l'ala
e accussì puru io m'addummisciu
cumentu com'un picciriddu
nta la paci di l'angiuli
rirennu pi cumpiacimentu
di comu mi veni 'n menti
bedda e amabili.
Poi arriflittennucci
sempri cchiossai mi pirsuaru:

un cuntu è chi un ti pozzu aviri
furtuna mia nun ti potti affirari
ma l'ultimu chi vinni nta stu cori
è un amuri chi nun può finiri:
fattu di cosi ruci e di sospiri.

*Questa poesia è dedicata ai miei
compagni di scuola futuri geometri e
no, che come me e a quei tempi,
avevano poca voglia di studiare ma, in
compenso, tanta vitalità e voglia di
vivere. Inoltre colgo l'occasione per
inviare a tutti loro un affettuoso saluto
e un augurio di Buona Pasqua 1985.*

Trapani 21/3/85

Rocco La Torre

A TURRI D'A PUNTA

Hannu passatu già vintinov'anni
e ancora mi ci porta lu pinzeri
mentri chi ora semu fatti ranni
ci penzu comu avissi statu aeri.
Aviamu a ghiri a scola ogni matina
sennu picciotti lu sangu chi vugghi
stari assittati cinc'uri di fila
nte naticchi sintiamu li canfuggi.
Si anticchia tempu bonu ni faccia
anzi di stari nta ddi quattru mura,
chi tant'assai a niatri un ni piaccia,
sinn'iamu a circari la natura
chi ora la chiamanu ecologia.
A Loggia allustravamu balati,

pani e panelli 'n manu pi mangiari
senza nenti passavamu jurnati
sempru na cosa l'aviamu a fari
e campavamu spicci e spensierati
senza nudda cammiali di pagari.
Aviamu un postu, chiddu cchiù speciali,
chi ni paria di stari a natru munnu
misu supra li scogghi di lu mari
cu l'acqua tutta chi firriava ntunnu
pittata azzurra di culura chiari.
Ddocu niatri c'iamu cuntenti
pi circari na speci di evasioni
luntani di li scusci e di la genti
stavamu sulì cu surispazioni
e respirannu a purmuna chini
tranquillità putiamu truvàri
senza ne prufissura ne parrini.
Ginu, Benignu, Nicasiu e Natali
quannu chi si stampava di la scola
a luna monti c'iamu a jucari;
na vota un sacciu cu quali curaggiu
ni ficimu lu bagnu pi Frivaru
ntall'acqua fridda puru o misi i Maggiu.
Si ancora nun l'avissivu caputu
vi parlu di la turri trapanisa
una di chiddi chi hannu risistutu
ch'è sempri dda comu na cabbasisa,
china di storia e china di misteri
fu fatta di cantuna e di balati
pi avvistamentu di filibustieri
di mori saracini e di pirati
misa sopra la punta di li casi
sintinella nte seculi passati
pusata dda, vigghia supra niatri.
Ha vistu genti chi ci va a jucari,

ha vistu picciutteddi ntrallazzari,
ha vistu succi e puru pisciazzati,
ha vistu iricci li nnamurati,
ha vistu varchi, bummi e kannunati,
navi affunnati e casi sdirrupati,
genti cuntenti e genti scunsulati.
Tanticchia tempu bonu e malutempu
li cosi tinti e boni su mmiscati
idda nun parla però va chiancennu:
tutti li guai di li trapanisi
li canusci cchiossai di certi "gnisi".
Cosi ni sapi di tutti culura
però mmezzu a li petri e li so mura
c'è un cori bonu chi batti pi niatri
e sutta d'idda si gori la paci.
Puru chi passanu ancora mill'anni
sta sempri additta e sta sempri vigghianti
p'i trapanisi è sempri daccussì
idda pi niatri è sempri "a Turri Gny".

LU PAISEDDU

Lu sangu chi ni scurri nta li vini
siddu chi nun è smossu s'addummisci
cu è chi va dappressu a li sportivi
di sicuru sti cosi li capisci,
si sentinu cchiù picca li dulura
mantinennu lu sangu arruspigghiatu
ni l'hannu rittu tutti li duttura
tinitivi lu corpu temperatu,
l'omu chi comu agghiorna accussì scura
cchiù tempu passa cchiù è ammataccatu.
Ora chi siti mezzi strapazzati
si vuliti sarvari la saluti
faciti sempri beddi caminati
la bicichetta un l'aviti a lassari
è ancora megghiu siddu nun fumati
viriti dunnì putiti arrivari!
Senza primura e iennu a giustu passu
quannu niscemu a fari na firriata
a na vintina chilometri arrassu
n'arricampamu dintra na contrada
a tramuntana a postu di marina
accussì bedda chi pari pittata
e sciuta fora di na cartulina.
Sutt'a muntagna è arriddussatu
stu paiseddu è bonu situatu
misu di sparti è pocu traficatu
si viri a corpu d'occhiu ch'è pulitu.
Quannu s'arriva c'è n'acchianatedda

doppu firria a ferru di cavaddu
pi na stratuzza chi è na vanedda
chi va finisci unni chiuri l'aneddu.
Li casi sunnu vecchi e arrizzati
li mura cu quacina su biancati
ci ni su' picca villini aisati
chi a mia mi parinu sordi ittati.
Aisi l'occhi e subbitu si viri
supra li rocchi pali ficurini
erbi e verduri cinn'è a tutti banni,
viri lu mari, viri li giummarri,
viri limuna marva e burrani
e arvuli di carrubba centenari.
Si senti ciauru di tutti maneri
di ciuri staddi e di favi zappati
di vacchi mannari e di fumeri
di pecuri e di terri sbutulati.
Ci su terri puliti e siminati
di furmentu piseddi e di patati
ci ni su puru chini a margheriti
nta li terreni senza lavurati.
Si ti ci trovi tu ci puoi ncuntrari
cani addini e tutti l'animali
viri vulari aceddi d'ogni razza
u corvu, a cucurciuta e a carcarazza.
Quannu succeri capita passari
pi la strata carretti cu li muli
e sentiri lu scusciu d'i cinciani
e li roti e li fusa 'ntangaliari.
Stu postu chi fin'ora v'ha parlatu
pari chi fussi sciutu di lu tempu
e fussi fattu pi essiri taliatu
com'un pissepiu si va mantinennu
di chiddi chi appartennu a lu passatu.
Nun v'hau dittu nenti di li rutti

chi ci ficiru dintra fabbricati
picchè accussi lu capiscinu tutti,
viremu si ora viatri l'abbisati
puru si ora c'hannu nchiusu vacchi
stu paiseddu è chiddu di Scurati.

*Spero che il collega Pasquale Corrao,
che mi ha dato la spinta, resti
contento; però io già ne avevo la
intenzione.*

LA MALA PASQUA 1985

Di quannu avia li causi curti
avi chi vaiu appressu a li "Misteri"
e mi ricordu quann'eranu rutti
e quann'eranu misi a San Micheli,
la trumma, lu cavaddu e li furcini
passavanu a San Petru nte macèri
quattrucent'anni di annacatini
ogni annu iddi sunnu sempri mperi.
St'annu successi pi lu dui d'Aprili
un fattu tristu di ammazzatini
cu purviri li ficiru satari
a napocu la vita ci livaru
natrapocu struppiati sunnu gravi
viri quantu famigghi ruvinaru
senza ne biviri e mancu mangiari.
Sunnu chistiani oppuru sunnu armali?
Certu si fussimu veru civili
sti scempi nun avissiru a passiaru,
essiri morti mentri semu vivi
mancu lu cuntutu si sappiru fari!
La ramigna puru chi cinn'è picca
nun s'ha pututu mai sdirrignari

ni spunta sempri doppu chi s'ascippa
è tinta e nun si può sdirraricari,
ci capitaru ss'animi nnuccenti
sulu picchè s'attruvaru a passari,
di ssi mpirugghi unni sapianu nenti.
Però la genti nun li può ammirari
puru chi li vulissi pirdunari
sempri ncuscienza nun putissi diri
chi sunnu sperti picchè fannu mali.
Quannu la cosa pari chi si calma
dintra c'arresta nfilata la spina
sciuscita lu ventu e la faidda sbampa
ventu furiusu chi porta ruvina
ascippa arvuli nichì e granni
e soccu ncontra nchiana e simina
e nun talia cu s'abbatti ravanti.
Li Misteri è na festa troppu ntisa
era na cosa chi s'avìa a fari
comu mangiari o mettisi a cammisa
nun si ponnu pi nenti trascurari.
Pi Trapani e p'i genti foresteri
quannu vennu di Cristu li tormenti
si nun scissiru fora li Misteri
mancannu iddi nun ci fussi nenti.
Si li Misteri avem'abbannunari
picchè attraversamu sti momenti
persimu la firucia di campari
a megghiu cosa è strinciri i renti.
P'i trapanisi sta festa è tutti niatri
e virennu passari a prucissioni
ni cunsulamu e ni sintemu mpaci
tutta sta massa di popolazioni,
era la festa di li nostri patri
e sicutamu sta bedda tradizioni.
Li musicanti cchiù tisi e ntrunati

Erano di la banda di Paceca
cu passu seriu e li facci mpitrati
ianu drittu nun taliannu a nuddu
e si sintia un tipu di sunata
chi si stampava nta lu ciriveddu
pi quantu era tuccanti e ncasata.
Dintra di mia mi ntisi arrisagghiari
li carni tutti mi ntisi arrizzari
cu dda sunata e cu ddi noti forti
paria chi passava friddu e morti,
di subbitu pinsai na ddu momentu
chi mi trovava all'accumpagnamentu.
Mmezzu a li lacrimi e vuccana amari
a usu chi passassi un timpurali
passa na cosa quann'av'a passari,
si dannu fa cu è chi l'avi l'avi
la vita ddocu nun si pò firmari,
idda camina senza rimissioni
ma si lu Munnu avissi a finiri
ni ricurdamu di la prucissioni
e nun scurdamuni lu dui d'Aprili.